



Matumuuna Inatsisartut aalajangiiffigisassaannik siunnersuuteqarpunga, Naalakkersuisut peqquneqassasut kingusinnerpaamik juni 2016-p ingerlanerani Inatsisartuni partiit isumaqatigiinniareerlugit saqqummiutissagaat, innuttaasut inuunermut ulorianaateqarsinnaasunik nappaateqartunut ilaqutaasut 2017-miit danmarkimi napparsimasut angerlarsimaffianni akeqanngitsumik najugaqarsinnaanissaannut aqutissiuussissallutik.

(Inatsisartunut ilaasortaq Mimi Karlsen, Inuit Ataqatigiit)

Inuit Ataqatigiinniit Mimi Karlsen isumaqatigilluinnarparput, pinartumik napparsimasut, ilaqtaminnik ataatsimik najorneqarunik, ineqarnerat nerisaqarnerallu akeqanngitsuusariaqartoq.

Inuiaqatigiinni inuppalaassuseq takutissinnaasariaqarparput oqaasiinnaatinagu piviusumilli atuutsillugu.

Tamatta ataasiakkaarluta takorlooriartigu qanoq nammineq misigissasugut, ulluni pinartumik napparsimalluta ilaqtanik najorneqarnissamik pisariaqartitsilluta , tikinneqarsinnaanatalu, issanersoq. Kialluunniit tamanna nalaakkusussinnaanngilaa.

Uloriantumik nappaammik tusarlerneqarneq, inuunerup naalerneratut tusarlerneqarnermut assersuunneqarsinnaavoq, naak qujanartumik qaangiisut amerliartoraluartut.

Eqqarsaaterpassuit nalaanneqartarput, annakkusunneq piusarpoq, asasanut najuerusunnerujussuaq takkuttarpoq. Ernuttat, ernutaqqiutit, tassa inooqataarusunneq annertungaartoq takkuttarpoq. Qimagutsinnani angumererusutat , tulleriutaarneqalersarput.

Tamakku tamarmik pineranni qanigisat, qaninnerpaat, aappaq, meeqqat, allallu peqatigineri tassaapput kisimik atorsinnaasut. Eqqarsaatersuutimmi tamakku nakorsaatisaqaanngillat. Taamaallaat qaninnerpaannik najorneqarneq.

Taamaattumik Mimi Karlsen qutsavigaatsigit, ilungersorlutit taamatut atugallit illersorniarlugit suliniuteqaravit, aporfissarsiorneq annertugaluqaqaaq, massakullu anguniakkat tusaasinnaasagut atuarsinnaasagullu malillugit angulerpasippat.

Naalakkersuisut allannguutissatut siunnersuutaat ataatsimiititaliami paasisaqarfigilluarnissaa, maleruagassallu qanoq ittuunersut pineqarnersut paasilluaqqaarusuppagut.

Allanngoriataarneq annertoqimmat, ukiarmimi qulequtaq assigisaanik anguniagalik, pineqarmat Naalakkersuisoq isumaliutissiissutip akuerinnginnissaanut 18.mio allaat taakkartornikummagit, massakullu 2 mio. kr-nik naatsorsorsimallugu.

Taamaakkallartillugu Mimi Karlsen-p siunnersuutaa aallaavittut Inuit Ataqatigiiniit akuersaarparput.

Ilaqtariinnermut Peqqissutsimullu ataatsimiititaliamut innersuullugu.